



O LE SULU SAMOA

EKALESIA FAAPOTOPOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

ADKUSO 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

FAAU'UGA FAIFEAU SAMOA 2020



OSIGA FEAGAIGA EFKS SAVAIA-TAI



FAASINO UPU

1. O le Lauga	2
2. Fa'au'uga Faifeau Samoa 2020	3
3. Tala o A'o'a'o Fa'au'u ma Faletua	4
4. Osiga Feagaiga EFKS Savaia	5
5. Na o Afioga e Tulei mai Fofoga	6
6. Mea'ai Tatau ma le Aso	9
7. Itulau mo Tupulaga	13
8. O e ua fai i lagi folauga	13-16

O LE LAUGA

Tusi Faitau: F. Tuai - Esoto 14: 10 - 16
 F. Fou - Mataio 11: 25 - 30

Matua: Esoto 14: 15 “*Ona fetalai mai lea o le Alii ia Mose, Se a le mea ua e alaga mai ai ia te au? Fai atu i le fanauga a Israuelu, ia latou o atu pea ia.*”

Manatu Autu: “O Faatonuga mo Puapuagā ma Faalavelave”

Ua le toe nā ma le laina tulaga o puapuagā ma faalavelave ua feagai nei ma le lalolagi. Ma o le upu moni, o le tasi a lea mea mautinoa o le soifuaga ma le lalolagi o loo tatou o i ai. Tatou te lē mafai ona aveese mai i tatou mai lenei lava mea moni - E feagai pea lo tatou ola ma le soifuaga ma puapuagā ma faalavelave. Afai e lē o lenei aso, a'o taeao a'ena; afai foi e lē o taeao, ae o loo i ai pea iēluā ma le lumana'i. O le tasi foi itu, o lo tatou lē mautinoa o fea tonu e ala mai ai puapuagā ma faalavelave, se'i tatou tapena i ai, ma nofo sauni i ai. A oo mai ai, a ua tatou iloa ona tali atu. Peitai le au uso e, ua saunia e le Atua lava ia, e ala i Lana Tusi Paia, Lona tamaoaiga faalelagi; ina ia avea o ni faatonuga mo i tatou, i taimi o le oo mai o puapuagā ma faalavelave. O Israuelu o se nuu feagai soo lo latou olaga ma puapuagā ma faalavelave. Mai lava i le amataga ina ua faato'ateleina o latou tagata, na feagai ai ma se tasi o puapuagā e ala i le tulafono a Farao - A fanau se tina Eperu ao se tama, ia fasiotia, a o se teine ia faaola. O ai na te lavā feagai ma lenei tulafono lē alofa? A o ai se Israuelu na te mafai ona tuu atu sana

fanau ia oo i ai tulaga faapenei? E mamafa puapuagā ma faalavelave na feagai ma Israuelu. Na iloa e Farao ua lē mafai le faatuputeleina pea o le faitau aofai o Israuelu, ona ia faasaga ai lea e faaopoopo le mamafa o galuega ina ia faapologaina ai Israuelu. Le ala lea o le oi, ma ua oo a'e i luma o le Atua le alaga a sa Eperū i le fia ola. Ona finagalo lea o le Atua ia alu atu o Mose ina ia faasaoloto le nuu.

Lea ua o ese mai Aikupito, ma aga'i atu i lo latou tofi o Kanana. Ae pagā, e le uma puapuagā ma faalavelave. O ai na te mafai ona sopoia atu le Sami Ulaula? A o ai foi a na lavā le sauā o Farao ma ana 'au, lea o loo faamalumalu mai i o latou tua? E le mafaia i se malosi o Israuelu ona tete'e atu. Lenei la, ua tatou maua mai e ala ia Israuelu lava ia, le ulua'i faatonuga mo puapuagā ma faalavelave. Fai mai Israuelu i le f.11-12, “*Toe foi i tua. Ona ua leai ea ni tuugamau i Aikupito, na e aumai a i matou ia matou oti i le vao? E le o le mea ea lenei na matou fai atu ai ia te oe Mose, ia e tuu pea i matou, ina ia matou auaua i Aikupito, ae leaga lo matou oti i le vao?*”

Ioe, tasi lea faatonuga o loo tausisi pea i ai le toatele o tagata i le taimi o puapuagā ma faalavelave – ‘Foi i tua’. Atonu o le a i ai se aso, auā e toe oso pea le la! O le faatonuga o loo fua i le mea o i ai le malosi ma gata mai ai le mafai ma le taumafaiga a le tagata. Peitai mo le Kerisiano, o ia lea na te iloa, o loo i ai se isi malosi e sili atu nai lo le malosi o ia te ia. O fea ua gata ai sona taumafaiga a o loo i ai Le e mafai ai ona taumafai pea ina ia manumalo i puapuagā ma faalavelave o loo la feagai. O le toe foi i tua, o le faatonuga mai le Israuelu ua faiaina, ma ua uma sona fia tauivi mo le lelei o lona tagata, lona aiga, lona nuu ma ona tagata. Peitai fai mai le faatonuga a Mose le ta'ita'i, “*Aua tou te fefefe, a ia outou tutū ma vaai atu i le olataga mai le Alii.*” O Mose o le ta'ita'i e faalagolago i le Atua. O le tagata ua talitonu ma faatuatua i le Atua. E le'i talia i lona loto le faatautau a le Israuelu faiaina, ina ia toe foi i tua! E musu e toe faafoi i tua Israuelu i le mea sa nofo pologa ai. E le'i ia te ia se lagona ia foi i tua lona nuu, pei ni tagata ua leai se faamoemoe ina ua lutia i puapuagā ma faalavelave. Fai mai Mose, “*Tutū ma Va'ai*” Se a le uiga? O lona uiga, o le ola faatalitali i le Atua. Afai ua gata se iloa ma se malosi i le tagata, tutū ma vaai. Vaai i le mata'utia ma le silisili ese o mea e faia e le Atua i ē faatalitali ia te Ia. Ioe, o le faatonuga i taimi o puapuagā ma faalavelave, o le

faatonuga o loo afifī ai i totonu le talitonu ma le faatuatua o se tasi i le Atua. E ui lava ina lē masopo’ia le Sami Uaula, e ui foi ina latalata mai Farao ma ana ‘au, tutū ma vaai; o loo i le Atua le mafai, o loo ia te la foi le silafia i ala tatou te manumalo ai. Ona fai mai ai lea o le faatonuga mai le Atua – ō aga’i i luma! “*Fai atu ia i le fanauga a Isaraelu, Ia latou o atu pea ia!*”

E fai mai Isaraelu – Tatou toe foi i tua. Fai mai Mose – Tutū ma vaai. A o le faatonuga mai le Atua – O i luma! Tatou ō agai i luma i le mea ua faatonu mai e le Atua ia i tatou. O luma le la o loo tu mai ai Iesu ma valaau mai, “*Ia outou o mai ia te a’u – o mai ma aumai a outou avega – o mea o loo fai ma puapuagā ma faalavelave ia te outou.*” E a? E tau’ave e Iesu. E tausoa faatasi ma Iesu ona tatou maua ai lea o le malologa o tatou agaga! O le a le malologa o agaga? O le manuia, ma le faaeaina, ma le manumalo o le Atua, ma e o pea i luma i le mea o loo valaau mai ai Iesu.

Ioe le au uso e, le Ekalesia ma le fanau a le Atua. A tatou foi i tua ona o puapuagā ma faalavelave tatou te feagai, lona uiga ua tatou talia le faatonuga a le Isaraelu ua loto vaivai ma ua leai sona faamoemoe. A faapefea la o tatou aiga, fanau, nuu, atunu ma le galuega a le Atua? Faapefea ona manuia a’oa’oga a fanau, atoa ma tiute ma faiva o loo feagai ai, pe afai e foi i tua le tali o ni puapuagā ma faalavelave e tulai mai? Ae faapefea le Ekalesia ma ana feau, ae maise le Tala Lelei mo lona faa-aluluina auā agaga ia faaolaina mo Iesu? Ioe, ua manaia le faatonuga a Mose – Tutū ma vaai; faatali i le Atua ma lafoa’i i le Atua ni mea o loo tatou popole ma atuatuvalē ai – o le faama’i oti (Koviti-19), faalētonu o le tamaoaiga, mala faalenatura, ma isi. O le finagalo o le Atua le au uso e, ‘Ia tatou o i luma’; o ma le faatuatua. O le mea ua gata ai le malosi o le tagata, o loo i ai Le ona le malosi uma lava. Na te tau’ave ma faao’o la tatou malaga. E lē o se faatonuga ua soona fai; o loo faia ma le silafia lelei o le Atua, o loo i luma le satauro o Keriso. O le satauro ua tuufua ma ua avanoa. Le satauro na alaga ai Iesu i le alaga o le manumālō – Ua taunu, ua fai lenei mo oe! O iina tatou te malu ai, ma saogalemu ai, i puapuagā ma faalavelave o loo tatou feagai. O mea ia o loo tofotofoina lou faatuatua ma saga faamalosia tatou e o i luma mo Iesu.

O le feagai ai o Iesu ma puapuagā ma faalavelave o le Galuega a le Atua, e le’i foi i tua pe solomuli, ae

na aga’i atu pea i luma ma le faatuatua i le Atua, seja oo ina manumālō i le satauro ma le oti. O le manumālō lena o Iesu, ua tatou manumālō ai faatasi ma la e ala i le faatuatua ma le salamō faamaoni. Ia ia te la le viiga e faavavau. Amene.

*Saunia: Luapene Lepo FS
EFKS Afega, Matagaluega MALUA.*

FAAU’UGA A’OA’O AVEA MA FAIFEAU SAMOA

O le sauniga o le Faau’uga o A’oa’o (mai Matagaluega i Samoa) mo le tofiga Faifeau Samoa, ina ia avea ma Auauna o le Upu ma le Sakarameta, na faia i le Malumalu o le Fale Iupeli i Malua, i le Aso Toonai 22 Aokuso 2020. Na ta’ita’i le sauniga e Asotasi Gu Time FT (Apia Sasa’e) ma o ia foi na saunia le Lauga. O le Tusi Paia na faitauina e Leaso Tupa’i FT (F/aga), a o le Tatalo mo le Faauuga o Ailepata Leuta FT (Aana). O e na faae’elima mo le au faau’u: Asotasi Gu.Time FT, Tavita Anesone FT, Tunumoso S. Iosia FT, Amuia Seuala FT, Fili Matalavea FT, Siolo Tauati FT. O le Failautusi KAT Iosefa Uilelea FT na momoli atu i totonu, ma tolaulau suafa ma faamatalaga faasino i le au faau’u. O le taitaifono KAT Tavita Anesone FT na ia tauaaoina atu Tusi Faamaonia o le Fa’au’uga. O Pese o le sauniga na taitai e le EFKS Uafato.

O aafiaga o puipuiga o le Faamai Koviti-19, ua le mafai ai ona faataunu le Fono Tele o lenei tausaga faapea le Faau’uga i aso e masani ai. Ua tulaga ese ai lenei Faau’uga e tusa o le faatofalaiga a le Komiti KMTA, ina ia faatino le faau’uga o A’oa’o e avea ma Faifeau Samoa i le masina o Aokuso i le atunu o i ai le aufaigaluega. O le aso lava foi lea na faia faatasi ai ma Faau’uga o A’oa’o i Matagaluega i Fafo, ia latou lava Matagaluega. I Samoa, na faatumulia le Iupeli i le mamalu o le aufaigaluega Toeaina ma Faifeau faapea aiga ma uo a A’oa’o faauu ma latou Faletua. Na mua’i laulelei faaleagaga le au faauu ma le faapotopotoga i le Upu folafola mai le ta’ita’i. Ae mulia’i ona mapu ane lea i le Fale Senetenari mo le taumafataga na saunia e i latou o ‘auga o ‘aute i lea aso, faatasi ma le lagolago malosi a le afioga i le Alii Pule, Faiaoga ma Faletua ma le paia i le Laumua ia Malua.

(Silasila itulau 4 mo Faamatalaga o le au faau’u)

FAAMATALAGA OA'OA'OA' FAAU'U MA FALETUA AVEA MA AUAUNA O LE UPU MA SAKARAMETA

<u>SUAFA</u>	<u>NUU</u>	<u>I MALUA</u>	<u>GALUEGA</u>	<u>AMATA</u>	<u>MTG</u>
1. Faaui BJ Faaui Eirenei Iloa Faaui	Levi, Saleimoa Lotopa, Papa Sataua Lalomanu, Sili	2013-2017	Ofisa - FaaMisionare Ofisa Tutotonu EFKS	2018	MALUA
2. Fiamalua Peleseuma Ulutogia, Sapapalii Faapisa Peleseuma Lalomanu		2013-2016	Ioane Viliamu Bldg Ofisa Tutotonu EFKS	2018	LOTOFAGA LEPA & ALEIPATA
3. Francisco Fatu Olive Fatu	Utualii, Lalomanu, Salelavalu. Vaitoomuli, Pagopago, Fasitootai	2013-2016	Kolisi Leulumoega Fou	2017	MALUA
4. Iese Uele Sia'eauli Uele	Utualii, Faatoia Ti'avea, Salani, Tuasivi	2014-2017	EFKS Vaiala	2018	APIA SASA'E
5. Samata Iusitini Leiloa - Faatoia, Vaovai, Rosalina Leiloa	2010-2013 Uafato, Fogatuli, Mangere Laulii, Satitoa, Sapunaoa, Mangere	Ioane Viliamu Bldg Ofisa Tutotonu EFKS	2016		APIA
(E le'i auai i le Faauuga ona o loo i Niu Sila i le taofia femalaga'iga ona o le Faama'i Koviti-19).					
6. Karā Siaosi Ipuniu Tuluiga Ipuniu	Vaie'e, Fusi Safata, Faleasi'u Si'utu, Patamea	2012-2015	Aoga Tusi Paia, Kolisi Faafaifeau Malua	2018	KOLISI MALUA
7. Nouata Saifoloi Fa'aao Saifoloi	Vaivase-uta, Satalo, 2005-2006 Melepone Ausetalia Saanapu, Satupaitea, Salamumu		EFKS Vailoa-uta	2017	FALEATA
8. Risatisone Taua Suitupe Taua	Paia, Samauga, Lalomalava, Fusi Safotulafai Tuana'i, Sasina	2013-2017	Ofisa FaaMisionare Ofisa Tutotonu EFKS	2018	MALUA
9. Ututau Siolo Samaria Siolo	Vaivase-uta, Utualii, Samalaeuu Vaiala	2013-2016	Ofisa FaaMisionare Ofisa Tutotonu EFKS	2017	APIA

O le Faauuga na faia i le Matagaluega Amerika

10. Ui Seanoa Luluvita Seanoa	Lotofagā, Safata Aukilani, Niu Sila (Silasila i le itulau 16 oloo iai le ata o le Faafeagaiga ma le Faletua.)	2003-2006	EFKS Emanuelu Compton	2007	AMERIKA
----------------------------------	--	-----------	--------------------------	------	---------

OSIGA FEAGAIGA, EFKS SAVAIA LEFAGA, AANA

O le susuga Nomeneta Simanu FT (Safaato'a-tai) le Faifeau Toeaina o le Pulega Lefaga & Faleseela, sa ta'ita'i le sauniga o le Osiga Feagaiga a le EFKS Savaia-tai ma lo latou faifeau susuga Clay Tofilau ma le faletua o Eseta. O le Tusi Paia (FTuai - 1 Tupu 18, FFou - Roma 11:1 - 6) na fatauina e le Failautusi Pulega: Keneti Leaupepe FS (Savaia & Tafagamanu), o Talosaga na taitaiina e Ruperake Petaia FS (Gagaifo-uta). O le Lauga na saunia e Esaroma Fatilua FS (Matautu-tai). Matua - Roma 11: 5 - 6; Autu - O E TOTOE. (O le Failautusi Matagaluega: Tuitoga Leota FS, Faleseela, o loo feagai ma le malologa). O le afioga ia Tusani Iosefatu Reti TK le taitafono o le EFKS Savaia, na saunoa e tusa ma le filifiliga a le Ekalesia e faapea: Ina ua latou faamavae ma le susuga Poka Maua FT & Malo ua penisione i le aso 7/7/2019 ona tausia lea o le galuega e Faifeau/A'oa'o Nofoaiga (Onosa'i Nofoaiga FS, Kaisara Asiasiga FS, Onosa'i Nofoaiga AM) ma Malama Tiitii AF. Na fuafua le uluai filifiliga a le Ekalesia mo so latou faifeau mo le aso 22/3/20, peitai ona o sa mo puipuiga o le faamai Koviti-19, na tolopo ai seia faatoa faataunu i le aso 17/5/20, i faifeau e to'a 6 na fai ai le filifiliga. O le aso 24/5/20 na faia ai le palota mulimuli na faamaonia e le susuga Toeaina ma le Failautusi Pulega, sa autasi i le susuga Clay ma Eseta Tofilau. Aso 5/6/20 na momoli ai le mana'o o le Aulotu ma sa talia lelei mai e le faifeau ma le faletua, a o le aso 8/6/2020 na faamautuina ai loa le aso o le osiga feagaiga e pei ona faataunuina ai i le aso 28 Aokuso 2020. Na faavae le molimau a le afioga Tusani i le upu 'Talofa', e faafeiloa'i aloaia ai lo latou tofi. A o le upu foi o le 'Talofa e', o le gagana o faamaisega ma alofaaga mo le auauna puapuagatia o feagai ma le galuega, pe afai e teena lana feau, ma tuulafoaiina e tagata o lona nuu. Peitai na folafola manino e le afioga Tusani le sui o le Aulotu, ua nofo sauni le Ekalesia e tausi lelei le auauna a le Atua, ma latou galulue faatasi e pei ona sa latou faia foi i le faasologa o le aufaigaluega na muamua.

Ona saunoa lea o le susuga Clay e tusa ma la la'ua filifiliga e talia le valaau, na faavae i le Autu - Nofoaga Na Amata Mai Ai. Na amata mai ina ua faato'a atoa tausaga e su'e ai i Malua, ona fesiligia lea o ia e lona tamā poo ua mafaufau e su'e i Malua? O lana tali masani i tausaga taitasi, o loo faatalitali i le musumusuga a le Agaga o le Atua. Na i'u ina faapea

mai le tamā e sauni e su'e ua uma ona faamaonia lona igoa mo le su'ega. Sa ia fesili pe faapeflea le musumusuga a le Agaga? Na tali le tamā, na ui atu ia te ia le faasinoga a le Agaga e ave lona igoa i le su'ega. Na ia faafetaia ai le alofa o le Atua e ala mai i le uuna'i malosi a matua (Emau Tofilau FS & Alaiumu), ma le sao taua o matua faaleagaga ia Ionatana Te'o FS & Vaito'a (Maugafiafia), Kirisimasi Fiti FS & Iliilo (Avao), Tonu Mauafu Peleseuma FS & Malelega (Iva) ae maise le susuga Muao Su'a FS & Tauvela (Vaitele-uta), faapea le Pule & uso faifeau faiaoga o le Kolisi Maluafou ma le afioga Agafili Tuitolovaa sa ulu i ai le galuega a le Malo sa auauna ai a o sauni mo Malua. Na ta'utino e le faifeau lo la'ua faatauvaa ma le mautinoa o le tele o itu e vaivai ai, e ala ai ona talosagaina le Ekalesia ae maise i le au matutua, ina ia 'aua le vaoia la latou fautua atu i le agaga o le mulumuluaufoe, e fatufatua'i ai le auauna mo le galuega. O Clay & Eseta na ulufale i Malua i le tausaga 2011 - 2014, ma sa auai uma foi lea vasega e molimau i le momoliga o lo latou uso faifeau ma le faletua i lo la'ua nuu.

O i latou na fai ma sui o le Pulega, Matagaluega ma le Ekalesia Aoao e faafeiloa'i, talia, faamaonia ma faamanua le faifeau ma le faletua, na valaauna i ai le afioga i le Ao mamalu o le Malo Samoa, afioga Tuimalealiifano Vaaletō'a Sualauvi II (AF), Ailepata Leuta FT (KMTA Aana), Tavita Anesone FT (Taitafono KAT), Faauuga Matautia FT, Palemia T. Reupena FT, Caesar Samuelu FT (Falelatai & Samatau), o sui o aiga na lua faapea sui o le Aulotu ma le afioaga i Savaia, auā le afio o Fui ma Malama ma Tusanilefaiaao ma le mamalu ia Leatialiifaigā. O le vaega mulimuli o le osiga feagaiga e ta'ua o le 'Folafolaga' - na folafola mai ai e le Ta'ita'i, i le suafa mamalu o le Alii o Iesu Keriso, le taliaina aloaia o Clay ma Eseta Tofilau e fai ma Faifeau o le EFKS Savaia. E le'i aunoa foi ona faamafanafana le susuga i le Toeaina ia Simanu i le faifeau ma le faletua tofia, i nisi o itu taua e mataala i ai mo le manuia o le galuega. Na taualuga le sauniga i le Sakarameta o le Faamanatuga na ta'ita'iina e le Faafeagaiga fou a le Ekalesia, ae tautuina e le aufaigaluega faifeau a le Pulega. Ona mapu atu lea i le Maota o le Galuega mo le taumafataga ma fa'aaloaloga faaleaganuu na faafaō i ai aao o le Ekalesia ma Aiganalua.

NA O AFIOGA E TULEI MAI FOFOGA O LE ALII

ALU MOTU E TAU I LE I'UGA

Filipi 3, “⁸O lo'u manatu ua lē aogā mea uma lava...o otaota lava ia mea, ina ia ou maua Keriso.”

A o falepuipui ai Ioane i le motu o Patamo, o loo mamao ese mai e pele ia te ia ma si'osi'omia e le fetagisi a le toatele o e sauāina ma saisaitia, na ia vaaia le fa'aaliga ia Iesu. O loo ia tusia e faapea, “¹⁷Ua ou iloa atu ia te ia, ona ou pa'ū ifo lea i ona vae e peisea'i ua oti.” Fa'aa.1. O se fa'aaliga uiga ese i totonu o puapuaga, fa'a-aunu'ua ma tuulafoa'iina; ma e faapena ona tutupu taaviliga o le soifua faale-faatuatua! O laasaga faigatā o loo ouluafesaga'i ma tauivi i le taimi nei, e mafai ona latou tafi ese ao pogisa o puaoa ai lau vaai, faamalosia oe e saili atili i le Atua, e maua mai ai tali mo lou olaga. O le to'atuga na fetaia'i ma Ioane o loo faamaonia ai, o mea leaga o le soifuaga latou te lē faalafiina le Alii, ae latou te fa'aalia mai o Ia. O osofaiga a Satani e ati a'e ai nai lo le faaleagaina ai o oe; e moni na te toso faa-tātā solo oe i le tino ma le mafaufau, ae sili atu foi ona ia fālōina oe faaleagaga.

I le mataupu 11 o le Tusi ia Eperu o tatou vaaia ai ni mea se lua i toa o le faatuatua: o galuega o lo latou faatuatua, ma le loloto o lo latou faatuatua. O fea na faamaonia ai e le Atua lona faamaoni ia Tanielu? O totonu o le lua o leona. O fea na fa'aali ai le Alii i taulele'a to'atolu o Iuta? I totonu o le afi na faafitū le malosi o lona aasa. E i ai le nofoaga i le Atua, o le mumū ma le aasa o tofotofoga e susunuina ai isi mea uma vaganā lou naunauta'i e fia iloa ma maua atili o

Ia. E ui ina o lena nofoaga e masani ona mamulu ese mai o tatou lima, ae ia 'aua ne'i mamulu ese mai la tatou vaai. O le faamoemoega sili lena o le aposetolo o Paulo e tusa ma lana ta'utinoga, *Fili.3*, “⁸O lenei foi, e moni lava, o lo'u manatu ua lē aogā mea uma lava ona o le silisili ese o le poto i la Keriso Iesu lo'u Alii; ona o ia ua ou faaleaogāina mea uma, ma ou manatu o otaota lava ia mea, ina ia ou maua Keriso.” Ua ta'u manino e Paulo e leai se mea e toe taofia, e leai se solomuli, leai se saafi faanoanoa; na o le mana'o e iloa atili ma maua maumautaia Keriso, ma le naunauta'iga e 'alu motu e tau i le i'uga' faatasi ma Ia. O se lu'i malosi lea mo i tatou, e manaia foi ae 'aua le tu'umāmāina.

AFAI E TE MANA'O I SE MEA,

IAE MUA'I AVATU SE MEA!

“³⁸Ia outou foai atu, e foaiina mai ai ia te outou; e foai mai e i latou i lo outou lava ie pulupulu le fua lelei, e lolomi ma luluina, e tumu ma solo i tua.” Luka 6.

O se tasi po na alu ane ai se alii i le fale o Tina Theresa ma ta'u i ai se aiga to'a valu e le'i faia sa latou mea'ai i le vaiaso atoa. Ina ua taunu atu Tina Theresa i lo latou aiga na ia iloa ai foliga o nai tamaiti o mafatia mai le lē lava o taumafa, ona ia tuuina atu lea mo i latou o se taga araisa. Ua faate'ia Theresa i se gaioiga na fai e le tina o tamaiti. Na ia taofi le tasi afa o le taga araisa i le latou fale, ae alu ese i fafo ma afisi le isi afa. Ina ua foi ane sa fesiligia e Tina Theresa poo fea na alu i ai? Na tali mai le fafine, “Na ou alu i le

NA O AFIOGA E TULEI MAI FOFOGA O LE ALII

matou tuaoi; o loo fia aai foi latou.” O le molimau a Tina Theresa e faapea, “Ou te le’i te’i i lona alu e ave le araisa; o tagata matitiva e masani lava ona agalelei. Ae na faate’ia a’u i lona iloa o loo fia ‘a’ai ona tuaoi. E pei se tulafono masani mo tagata puapuagatia, e leai se tasi e toe maumau se taimi e mafaufau pe manatu ai i nisi tagata.”

O loo a’oa’o mai le Tusi Paia afai e te tulimata’i ma faamamafa mana’oga o isi tagata, e silasila le Atua ia mautinoa e tali lelei ou foi mana’oga. *Efeso 6, “8 o iloa e outou o le na te faia se mea lelei, e toe maua lea e ia mai le Alii.”* O le mea lea afai e te manao i se mea, ia avatu se mea! Aisea e faapea ai?

(i) O le foai atu o le ki lea e tatala ai potu o faamanuiaga. Ua a’oa’o mai le Alii o Iesu, Afai e te foai atu i isi tagata, e toe foaiina mai ia te oe le fua lelei, e faasili ma e taumasuasua. (ii) O le aofa’i o le fua e te lulu nei e faalagolago i ai le tele o le fua e te selesele mulimuli mai. E leai se fua e itiiti, e leai se fua e lē tupu ma ola ma faateleina pe afai e te naunau e lūlū. Afai e te maua se faamoemoega e sili atu nai lo le faamuamua o ou lava manaoga, ma e sasa’ a atoa i ai lou ola, e lua ni mea o le a e silafia: Muamua, o se mea lelei le ta’utino o ou vaivaiga ma tapula’ a, tau lava ina ia ‘aua le faa-ogatotonu i lou olaga. Lona lua, e faamatuu mai faamanuiaga a le Atua pe afai e te foai atu mea ua e maua, ae lē o le talanoa i mea na o le fia maua ma fia fai ae lē o i ai. E sili le manu e tasi ua i ou lima e te avatu mo se isi, nai lo le tele o manu i le vaomaoa na o le moomoo i ai. O le mea lea afai e te mana’o ia maua mai ni mea se tele, ia mua’i avatu uma nei le mea o loo i ai.

O FAASINO OE E LE ATUA I SAREFATA?

I Tupu 17: ”⁹Tula’i ia oe, ma e alu i Sarefata..ma e nofo ai.”

Na mātūtū ma mate le alia na inu mai ai Elia, na lē toe o ane foi oreva ma ni areto ma aano o manu e fafaga ai o ia. Pe afai e oo mai taimi faapenei, o loo i ai se mea o finagalo le Atua e ta’u atu ia te oe! O loo fia fai atu, e te sauni e alu ese, ma alu i Sarefata. O le feau lena mo Elia, ia alu i le fafine ua oti lana tane o loo i le aai o Sarefata na te fafaga ia te ia. O se mea faigata tele lea mo se ta’ita’i sa masani ona auauna i isi tagata. Na maua e Elia le fafine i totonu o le vevela o le oge o loo sauni le la’ua mea’ai mulimuli ma lana tama ona la’ua oti lea. Ui i lea na lu’i e Elia le fafine ina ia usita’i i le Atua ma na folafola atu, “¹⁴E le uma le kate falaoa, e le faaitiitia le suauu i le fagu, seja oo i le aso e foaiina mai ai e le Alii le ua i le laueleele.” Na faapefea ona maua e Elia le faatuatua e fai atu ai lea folafolaga? Auā ua uma ona ia faamaonia le alofa faamaoni o le Atua i lona lava olaga!

Faato’ a mafai ona e talanoa faale-faatuatua pe afai e te savali faale-faatuatua. O le faatuatua e pipisi; o lou fai paaga ma tagata faatuatua e te pisia ma faatupu atili ai lou faatuatua, e pisia ai foi ma faateleina le faatuatua o isi ona o oe. O le mea lena na tupu i le fafine Sarefata. Atonu sa le’i lava ni a la’ua taumafa pei o le toatele - e ‘ai i le taeao, aoauli, afiafi ma le po ma vai-aiga - peita’i na silasila le Atua ia mautinoa e i ai sa la’ua mea’ai i taimi uma o le oge. O le mea

NA O AFIOGA E TULEI MAI FOFOGA O LE ALII

lea, afai o lena e te i Sarefata, e lē o lava mea e tatau i le taimi nei, ia usiusita’ i i le Atua ma fa’aaogā lelei mea ua Ia foai atu, ma talitonu ia te Ia e i ai lona taimi talafeagai, ona Ia auina mai lea o se faaopoopoga ma se faasiliga mo oe. Ia maitau ane foi, sa tau fai tofotofoina le faatuatua o le fafine ma le faatuatua o le perofeta. O lona uiga pe afai o oe faato’ a tau amata lou ola faatuatua, poo oe foi ua matua lou soifua faale-faatuatua, e tutupu pea oge, e tutupu pea tofotofoga o le faatuatua mai lea taimi i lea taimi. O e faalogo atu o faasino oe e le Atua e te alu i lau Sarefata? ‘Aua e te fia finau, ae ia usita’ i. “Tulai ia oe ma e alu...” O ana faamanuiaga ua sauni mai ae faamoemoe i lou usita’ i ma lou faatuatua e te maua ai.

PE A ILOA UA E FAAMAGALOINA MONI SE ISI

“*Tanielu 3, “²⁷ua lē namu afi lava i latou.”*

Ina ua lafo e le tupu o Nepukanesa o Sataraka, Mesako ma Apeteniko i totonu o le ogau mu afi aasa, na lavea’iina i latou e le Atua ma toe aveina a’ e aunoa ma so latou ‘namu afi’! E leai se manogi e iloa ai pe manatua ai le afi aasa sa latou i ai. E i ai tagata ua tatou tau mai i ai o loo namu afi pea lava. E iloa i a latou amio ma faamatalaga e faapea mai, ‘Sa ou feagai ma taimi faigata, ma o loo lagona ai pea lo’u mafatia’ E faapefea oe? O avea aso sa e tiga ma mafatia ai e faa-ma’aina ai lou loto, pe faamalūlūina ai? Afai e te saunoa atu, e te tautala i mea lelei poo le leaga? O saisaitia pea oe i mea na tutupu

o aso ananafi? O e talanoa atu i nisi tagata e faalogo mai e uiga i ou mafatiaga? O e silafia le mea lena e te faia – o lou saisai o oe i filifili u’amea o le tuana’i. O loo e faia le natura o le elefane. O elefane a o laiti i le taimi latou te le’ i iloa lelei le gafatia e oo i ai lo latou malosi, e saisai i latou i se maea ma nonoa i se pou, e taofi ai i latou mai le sosola ese. Pe a oo ina matutua ma malolosi, ua mafai ona latou sosofa le maea mai le pou ma sosola ese, ae latou te lē faia, e saisaitia ai pea lava. Auā ua latou taliaina, e tumau le tapulaa o lo latou malosi. Peita’i e lē o le maea ma le filifili o loo saisaitia i latou, ae o lo latou manatua ma mafaufau pea i le tulaga sa masani mai ai i le tuana’i a o laiti.

Pe afai o loo faapena lou soifuaga, le saisaitia i noanoaga o manatunatuga i tiga o aso ua te’ a, o le Afioga a le Atua e faamalosi’ au mo oe o lenei: *Isaia 26, “¹³Le Alii e, lo matou Atua, sa pule ia te i matou nisi alii e le na o oe; ua na o oe lava matou te vivii atu ai i lou suafa. ¹⁴Ua oti i latou, latou te lē toe ola; o agaga i latou, latou te lē toe tutū; auā ua faasalaina, ma faaumatia i latou, ua e faagaloina lava le manatu uma ia i latou.”*

Poo le a lava le ituaiga manatunatuga o loo ia faapologa oe, ua tatau nei ona e amata folafola ma faatinō lou saolotoga, lavea’i oe mai le saisaitiaga. E te amata tu ma pipii i afioga paia a le Atua, ona maua lea o le malosi fou e faasaoloto mai ai lou agaga, ma te’ a ese ai e lē gata o le ‘namu afi’ ae o nisi nanamu o mea tuai.

O MEA'AI E TATAU MA LE ASO (OUR DAILY BREAD)

(*O mafauauga faaleagaga o nisi aso faaliliu mai le Tusi Faitau Aso IBRA*)

Vaiaso 30 Aokuso - 5 Setema 2020

Aso Gafua, 31 Aokuso 2020

Manatu Aoao Vaiaso: **MEAALOFA ESEESE**

Aso Sa, 30 Aokuso 2020

O Ala o le Atua Tusi Faitau: Roma 11:25-36

“³³*Auē! Le loloto o le tamaoaiga o le poto atoa ma le silafaga a le Atua. E lē masu ‘esu’ eina ana faamasinoga; e lē mafai foi ona iloa ona ala.*
³⁴*Auā o ai ea se ua iloa le finagalo o le Alii? Po o ai foi se ua pulega faatasi ma ia?”*

O se tasi o lu’i o le avea ma Kerisiano, ona o le soifuaga faa-Kerisiano e tuufaafeagai ma le faamamafa a le lalolagi. O vaaiga ma faatinoga e tauia i le lalolagi e eseese ma vaaiga ma faamoemoega o le Upu a le Atua. O ala o le Atua e foliga sala ese mai le fua faale lalolagi. O tagata tafafao e asiiasi i atunuue ese e masani ona latou vaaia le eseesege o tu ma aga o feiloaiga i vaega eseese. Pe afai ou te malaga ese mai le aiga i Peretania aga’i atu i le aiga i le atu Keripiane, ou te faamanatu pea ia te a’u e tatau lava ona fai se upu ma se faamatalaga faafeiloai i soo se taimi ou te ulufale ai i se potu. E alu le aso atoa o fai le ‘Talofa’ ma le ‘Taeao Manuia’. Na fesili mai lo’u atalii pe aiseā e faapea ai tagata Keripiane, e fa’auau le faatalofa ‘Taeao manuia’ ae ua leva ona te’ a le taeao, ae i Peretania e lava na o le luelue o le ulu. Na ou tali i ai o se vaega o le aganuu ma e tatau ona tatou a’oa’oina ia iloa ma masani i aganuu o soo se nofoaga tatou te asiiasi i ai.

E faapea foi, e ao ona tatou taumafai e malamalama i le finagalo o le Atua. O ala o le Atua e foliga tuufaafeagai ma faiga masani e ala ai ona lē oo mai e tusa ma le natura masani o le olaga. E tatau ia i tatou ona faitau manino le afioga a le Atua, e su’esu’ e loloto i ai, e fa’али i ai mafauauga lelei ma filifili e mulimulita’i i ana poloaiga uma. A o tatou a’oa’o ma sailili i le Atua ma Lona finagalo, tatou te malamalama ai i le atamai o ona ala uma.

Le Atua o le poto ma le malamalama, a o matou a’oa’o atili i lau Afio, ia matou malamalama i ou ala ma savavali ai. Amene.

Meaalofa Eseese Tusi Faitau: Roma 12:1 – 8

“⁵*E faapea i tatou nei le toatele, ua tino e tasi ia Keriso, ma ua fefaafeagaia i itu tino.*⁶*O loo eseese foi a tatou mea e tufaina mai le alofa tunoa ua foaiina mai ia te i tatou.”*

Ua faafia ona tatou faatusatusa i tatou ma isi tagata! Maimau e, pe ana ia i tatou taleni ma agavaa o loo tatou maitauina i isi, pe ina ua tatou faasili o tatou lava lagona ona e i ai nisi mea e faigofie ona tatou maua; o le tautala i nofoaga faitele, o le faia o faigauō, o le faigofie ona tatou feoa’i solo i aai fou. Peitai o le eseese o meaalofa e lē tatau ona taitaiina i tatou i le faasiasia ma le loto leaga. O le atamai o le mataisau o le Atua, na faia faa-eseese ai i tatou e le Atua. O le eseese o lona uiga ia ‘aua le tutusa faale-natura, o le tino mai, ma le tulaga ‘anoa/anofale. E tele atunuue latou te talia fiafia eseesege, ma o i matou tagatanuu o Jamaica e mitamita i lo matou lava foi eseese. Matou te fiafia i le eseese o matou ituaiga faaleatunuue, a o matou ioeina lo matou faamoemoe tuufaatasi.

Peitai e ui o loo i ai i le tele o itu o le lalolagi lenei mafauauga o le faaaloalogia o eseesege, e i ai taimi tatou te lē mafanafana lelei i le nonofo faatasi ma i latou tatou te eseese. I le Roma 12: 1-8, ua faamanatu mai ia i tatou, o le auala a le Atua e eseese ma auala a le lalolagi. O le auala a le Atua e talia fiafia eseesege. I o tatou olaga, o lo tatou matala atu i isi e ese ma tatou, e lu’itauina ai tatou e iloilo vaaiga fou ma fesiligia mafauauga tuai. Illo tatou faiā fesootai ma isi, o le taliaina ma le fiafia o le meaalofa o le eseese, na te faatagaina i tatou ia maua se malamalamaga sili atu ona manino faasino i nuu ma faalapotopotoga faapea le avea ma ‘tino e tasi’. O le taliaina fiafia o le meaalofa o le eseesege e manaomia ai se alofa i la tatou pitolaau. O lona uiga e tatau ona tatou laa i tua mai o tatou talitonuga maumaututū ae faasiasia, faasino i isi tagata e ese o latou foliga, ese o latou leo, pe ese o latou mafauauga

O MEA'AI E TATAU MA LE ASO

mai ia i tatou. Peitai e lē mafai ona avea i tatou o se Ekalesia atoa e aunoa ma le meaalofa ma le auai o le tasi ma le isi. O le ala lena a le Atua.

Le Atua le Tama, alofa faamagalo i matou i le faa-ese o isi uso matou te lē malamalama i ai; ia e a'oa'o i matou ia alolofa faamaoni le tasi i le isi, e tatala avanoa mo isi e eseese ma matou. Ia lu'iina i matou ina ia fa'aaloalo ma taliaina isi tagata e ese la latou vaai i le soifuaga nai lo i matou, ia fealofani fiafia ma isi ma tini ai la matou sailiga malo mo se lalolagi atoatoa. I le suafa o Iesu. Amene.

Aso Lua, 1 Setema 2020

Ia lē faavaivai Tusi Faitau: Roma 12:9-13

"Aua ne'i faatagā alofa; ia inoino i le leaga, ia pipii i le lelei."

O faasalalauga faa-agafesootaiga (social media) ua na suia atoa fesootaiga faaonaponei. O le gagana ma faamatalaga o aso taitasi ua aofia ai nisi upu fou, faapea ma upu masani ua suia o latou uiga. O upu e pei o le 'uo', 'lē uo', o faailoga eseese (emoticons, hashtags #), lol ma le anoano o isi upu/faailoga. I faasalalauga faa-agafesootai, o fesootaiga e sili atu ona vāvā lalata ae sili atu ona lauiloa faalaua'itele. O i latou e aofia ai e sili atu ona toatele, ae o loo fefaaasoaa'i ai faamatalaga auiili i sili ona mautotonu faamilitino. O sikaili/aulala o fesootaiga e sili ona faasamasamanoa ma e sili ona pupu'u. O lagona e faamatala i upu ma auala e sili ona fiafia, e fa'aali atu ai le lē popole tele i se isi mea ma nisi tagata. O le fesoota'i i auala faapenei e mafai ona aafia ai la tatou vaai i le alofa ma faiā o sootaga. Poo tatou faaitiitia le tāua o nei lagona, ma liua faamaulalo ai ia avea o ni faailoga e faigofie ona oomi ma sa'eu?

I le Roma 12:9-13, o loo aumaia ai e Paulo se fua faatatau mo le alofa: o le pipii i le lelei, ia latalata i le isi. Mo Paulo, o le alofa e faasino i le mamalu, naunautaiga, auaunaga, faamoemoe, faapalepale, onosa'i, faamaoni ma le agalelei talimalo. O nei upu ***o upu galue!*** E manino lelei le uiga ina ua lu'itaunia i tatou e le Atua ina ia tatou fealofani, e alofa le tasi i le isi. I le 1 Ioane 4:7 – 8, ua faamanatu mai ai o lenei ituaiga alofa, e na o i latou 'ua fanau i le Atua

ma iloa le Atua' e mafai ona aumai ai. O le alofa e lē mafai ona faaitiitia e avea o se faailoga i luga o se tulaga faafoliga. O taimi uma tatou te oomi ai faailoga faafoliga pe kiliki le ki o le (like), e tatau ona tatou fesili ifo poo le a tonu le faamatalaga o tatou fia fai atu! O le alofa o le faatinoga! O le asō, e te ono amatamea pe tali atu foi i se talanoaga, pe maitauina se suiga i luga o faasalalauga faa-agafesoota'i. I lau vaai faa-soo o Keriso, o nei talanoaga o ni tala faasamasamanoa ma matavale? O avea au upu ma faatupu tiga ma faatupu manu'a? O tula'i mai lau fesoota'iga o se mea faafoliga, e papa'u ma faata'eta'ealuga? E moni lou lagona a o e oomi le ki o le 'mana'o'(like') ma le 'alofa'? O tutusa lou faauigaga ma le faauigaina e le Atua? Ia manatua: '*Aua ne'i faatagā alofa (ia moni le alofa)*' Roma 12:9. O le auala lena a le Atua.

"Le Atua e, a'oa'o mai ia matou iloa ona faaali atu le matagofie o Keriso i mea uma matou te faia, e ala i le olaina o le alofa o Keriso i soo se auala e mafai ai. Amene.

Aso Lulu, 2 Setema 2020

Ia lē taui ma sui Tusi Faitau Roma 12:14-21

"¹⁷Aua le taui atu le leaga i le leaga i se tasi; ia sauniuni mea e tusa i luma o tagata uma lava.

¹⁸Afai e mafaia ia te outou, ia outou nofo lelei ma tagata uma lava."

O faamasinoga mo le toefuata'iina e peisea'i o se faiga e tuufafeagai ma tu ma aga masani. Pe a faamamafa le vaai i le toe faaleleia o le tagata ua molia/faasala ae lē o lona faasalaga, e peisea'i e lilifa le lagolago i le puapuagā o lē ua solitulafono nai lo lē ua afaina (victim). O faamasinoga mo le toefuata'iina e manaomia ni vaega e i ai o latou sao i se soligatulafono ua patino, ina ia o mai faatasi e mata'itū auala talafeagai e faafetaia'i ai tuatuagia o le moliaga. O le faamamafa e lē o luga o le tuuina atu o faasalaga mo le soligatulafono, ae i luga o le toe faafosisa o faiā i totonu o le sosaiete, po o le faalauiloaina o se feeseseseaiga ua leva, mata sa fai ma afuaga o le faatinoga o le soligatulafono i le amataga.

Ia Ianuari 2018 na faatuina ai e le Malo Jamaica se tulaga o faalavelave faafuase'i faalauaitele i vaega o le atunu ina ia taofia le siitia maualuga o soligatulafono. Mulimuli ane i lena tausaga, na

faatuina ai e le Eklesia UNJCI le Faamaite mo le Filemu o le Atunu (National Peace Initiative) e tulimata'i ma faamamafa le filemū ma fausia sootaga lelei i le atunu. O lenei faamaite e aofia faatasi ai lē ua afaina ma lē ua molia, ma sailili i auala e faalauiloa ai feeseseaiga ma tiga, o auala e maua mai ai faamanuiaga mo se taimi umi. E oo atu i le afuaga o le soligatulafono, toe fatufatua'i ai le tagata solitulafono e faapea foi le tuuina atu o le leo ma le paoa e tatou ai i lē ua afaina. O le faitauga ma le feau o le asō o loo faamalosi'au mai ia i tatou ina ia saili i auala e faalauiloa faalauaitele ai feteenaiga e lē o faamamafa le taui ma sui ae o le galuega mamafa i le fausia o faiā ma tetee atu i le faatupuina o le tiga. E faigata ma e faafeagai ma faiga masani. Ae o lea le auala a le Atua. Ae e lē mafai lenei auala aunoa ma le alofa tunoa o le Atua, auā e feteena'i ma le natura o tatou lagona faa-tagata le aveese o le taui ma sui a o faaleagaina i tatou. Ia tatou tatalo mo lena alofa tunoa i aso uma.

Le Alii e, e ala i lou alofa tunoa ia faamālōlō lo matou tiga. E ala i lou alofa tunoa ia faasino mai pe faapefea ona faamagalo. E ala i lou alofa tunoa ia faamalosi mai i matou ina ia faatoilaloina le leaga i le lelei. I le suafa o Iesu ua matou tatalo atu ai. Amene.

Aso Tofi, 3 Setema 2020

O le Atua ma Pulega a Tagata. Roma 13:1-7

"O lenei, ia avatu i tagata uma lava a latou mea; o le lafoga i e ua tatou i ai le lafoga; o le tiute i e ua tatou i ai le tiute; o le mata'u i e ua tatou i ai le mata'u; o le fa'aaloalo i e ua tatou i ai le fa'aaloalo."

O le totogiina atu o mea e tatou atonu e lē faigata ona talia o se faiga faavae, peitai a oo ina faatino tatou te iloa ai lona faigata tele ona fesoota'i i itu uma o le soifuaga. O se tasi o faataitaiga o nei auaunaga tuuina atu, o le tuuina atu lea o le fa'aaloalo ma tiute faatagatanuu i le malo. O le ta'utinoga faatagatanuu o Jamaica o se folafolaga e faia e soo se tagatanuu i soo se potopotoga ma mea fai a le malo. O se tautoga ma se tatalo. O tatou soifua o ni tagatanuu lelei i le lalolagi a le Atua? E oo lava i faiga malo e pi'opi'o ma pulega faalenuu e lē talitonuina,

o le finagalo o le Atua e tatau ona tatou totogi atu mea ua tatau ai i le malo. Ia mafaufau ma manatu ifo i lo tatou lava atunu. O i ai ni auala o e manatu e tatau ai ona totogi atu mea o loo e nofo aitalafau ai e tusa ma lou valaauna o le tagata o le Atua? A o le isi itu, o le Tusi faitau o lenei aso e mafai ona faamatalaina faapea o le malo e sa'o i taimi uma. O le a sou manatu i se tali atu a Paulo i faiga malo ua umia le tele o le pule ma le malosi o le paoa ma ua latou soona olopalaina ona tagatanuu? O a nisi Tusi faitau o loo faasino i ia tulaga?

Le Atua lo matou Mataisau o Le ua na tuuina i matou i faapotopotoga, ua e lu'iina i matou ina ia matou totogi atu o mea ua tatau i le fa'aaloalo e ala i le faalauiloaina o le amiontonu, o le tutū faatasia ma le filemu. Ia e ta'ita'iina i matou ia mulimuli i ou ala. I le suafa o Iesu. Amene.

Aso Faraile, 4 Setema 2020

Alofa ma le Tulafono Tusi Faitau: Roma 13:8-14

"⁹Auā o upu ia...o loo ua aofia lava i lenei upu, Ia e alofa atu i lē lua te tuaoi, ia pei o oe lava ia te oe. ¹⁰E lē agaleaga atu le alofa i lē la te tuaoi; o lenei, o le alofa o le atoatoa lea o le tulafono."

Pe afai tatou te toe foi i aiga ina ua mae'a se malaga, tatou te fa'aaoğā se faafanua e faasino mai le ala, pe fa'aaoğā foi lo tatou iloa e tusa ona manatua i le mafaufau. O le faafanua e fai ma ta'ita'iala; i le isi itu, ona ua tatou uia le ala muamua, tatou te faalagolago ai i lo tatou manatuina o le ala. Ile Roma 13, ua faamatala e Paulo le tulafono o se tusitusiga e mulimulita'i ai ina ia toe faaleleia ma le Atua. Ua tele auga tupulaga o faalagolago le nuu o le Atua i le tulafono ma taumafai e mulimuli i poloai. Ua avea le tulafono o se faafanua na te ta'ita'i i latou i se sootaga ma le Atua. Ua tusi mai Paulo ina ua afio mai Iesu, o le alofa ua faasili atu nai lo le tulafono. O le alofa na te ta'ita'iina i tatou i lo tatou aiga i le Atua, talu ai ona e mafai ona ta'ita'i i tatou e lo tatou soifuaga ma le poto masani i le malamalamaga o le Atua. Tatou te faia mea e tatou ona fai auā ua tatou iloa mea e finagalo ai le Atua, ma e mana'o o tatou loto e faafafia lo tatou Atua. O le tua'ā o lo'u tina i Jamaica e masani ona ia faaaogā muagagana tuai e faamalosia ai mea sa tautala i ai. O se tasi o ana

faaupuga masani e fiafia ai, ‘O lē na te lagona na te iloa’ (Who feels it knows it). Na te faaaogā le faaupuga lea pe a ‘otegia i matou e lo matou tina, ma matou faaseā atu ai ia te ia. Ou te manatu o le uiga o lana faaupuga, pe afai matou te lagona aafiaiga o a matou amio, o le a matou manatua le a’oa’iga ma le ‘ote a tina, ma lavea’iina ai le toe faia o le mea sesē. O le faitauga lenei mai le Roma ua faamanatu mai ia i tatou, o le alofa e le gata o se mataupu ia iloa, ae o se mataupu ia ola ai. E tatau ona lagona ina ia iloa. O le alofa na te ta’ita’i i tatou ia iloa atili le Atua o loo fai la tatou sootaga; o le alofa na te lu’iina i tatou ina ia tali atu mo le naunautaiga e fai mea ua finagalo ai ma fiafia ai le Atua.

Le Atua alofa e, ia faia a’u ia ola mai lou alofa; ma ia tatala lo’u ola ia alofa atu i isi. Amene.

Aso Toonai, 5 Setema 2020

‘Aua le faamasino atu

Faitau: Roma 14:1-12

“¹⁰O oe na, se a le mea e te faasala ai i lou uso? O oe na foi, pe se a le mea e te ta’u faatauva’aina ai lou uso? Auā tatou te laulaututū uma lava i luma o le nofoa faamasino o Keriso. ¹¹Auā ua tusia, ‘Ua fetalai mai le Alii, Ou te ola a’u, e tootuli mai ia te au o tulivae uma lava, e ta’uta’u mai foi o laulaufaiva uma lava i le Atua. ¹²O lenei, e taitasi i tatou ma tala i lana amio i le Atua.”

O le lilifa atu o mafaufauga e tatau ona fai e isi tagata uma mea i le auala tatou te faia ai, o se tulaga e

faaletagata tele. Tatou te taliaina lelei e faapea, talu ai ona o auala tatou te mafaufau ai ma faatino ai feau o auala fetaui, e tatau ai ona avea ma auala masani. I totolu o le soifuaga faale Ekalesia, e ono oo atu lenei mafaufauga i le tuuveseeseina o le au faatuatua ona o fevaevaeaiga i talitonuga ma faatinoga e eseese. O le faitauga o lenei aso ua na faasino mai, i mataupu e lē ogatotonu i a’oa’oga a Keriso, e tolu ni mafuaaga e ala ai ona ‘aua tatou te faamasino atu i isi: (i) Ua uma ona talia e le Atua i latou tatou te lē au faatasi (f1-4); (ii) e ao i tagata taitoatasasi ona matuā maumaututū i lona mafaufau pe faapefea ona ia faamamaluina le Atua (f5-6); (iii) ua maliu Keriso mo tagata uma ma o le Atua e i ai le pule e faamasino ae lē o tatou (7-10). O le Fono a Ekalesia i Jamaica (JCC) e i ai le faitauga lenei i totolu o lana tautinoga o le Misiona ma le Vaaiga mamaao: ina ia faamalosi ‘le tino mai o le tuufaatasiga o le Ekalesia i Jamaica, le Keripiane, ma le Lalolagi, i le faataunuuiina o le galuega ma le talaiga o Iesu Keriso.’ O Jamaica e tele naunau Ekalesia eseese, ae o le ta’utinoga a le JCC o loo faamaonia ai, o le ‘tino mai’ o le loto gatasi o Kerisiano o se mea ua talafeagai, ma e galulue uma ona sui ina ia taunuū lenei faamoemoe. O i ai nisi taimi e nimo atu ai i la tatou vaai lo tatou faamoemoe i le lalolagi, a o tatou pa’u’ū atu i le faaosooosoga e faaseā i feeseseseaiga nai lo le ola i se soifuaga e ta’u atu ai i isi tatou te iloa ona ‘tasi i le agaga’?

Le Atua e, Ia e faia i matou ma avefu’ a o se Kerisiano tuufaatasasi, e faaali atu le āva ma le faaaloalo i isi Kerisiano e ui ina i ai o matou feseseseaiga. Amene.

PE A MISA LE AUSOO

O se tasi Aulotu i le Iunaite Setete Sa le o gatasi le futia ma le umele I le Faifeau ma lana tama Faipese Na aafia ai ma le tapuaiga faitele

Lauga le Faifeau Tula’i mo le Alii Ae ta mai le pese sosoo ai a le sifi *‘I shall not be moved’ e taufaalili* Tuua le lotu leai se agaga e fia vivii

Le isi Aso Sa e lauga mai le matua Ia fai taulaga ma foa’i mo le Atua *‘Jesus paid it all’ le pese na usua* Leai se feiloa’i masani ina ua tu’ua

Aso Sa lona tolu ua lauga i le fitala Tuu le fela’ua’i solo ma taufaaleaga *‘I love to tell the story’ le pesega* Na faafetaia’i ai e le tama o le ata

Ua lē lavā onosai e le Faifeau lenei Folafola ua manatu o le mea e lelei Pe a ia faamavae e tuua le galuega *‘O why not tonite?’ na faaiu ai nei*

Mulimuli ane folafola e le Faifeau Ole faasinoga a Iesu, ua alu ese ai *‘What a friend we have in Jesus* Le tali a le Faipese ua fiafia faafetai

E tutupu maseiga ma fe’eseeseaiga E tonu e sa’o le tagata ia te ia lava Ae iloa le alofa moni i le Alii o Iesu Ina ua vave le toe fai lelei o sootaga

Mataio 18:15-20 o a’oa’o mai ai Le va fealoai ile lotoifale Kerisiano Mulumuluafloe ma oloolopitovaa E maua malo i le tau fai faamaulalo

E faigofie ona talia mai o manaoga Pe a ole ma le loto gatasi se toalua Aua e i ai ma Iesu na te faamaonia Talosaga uma e tuuina atu i le Atua A o le fevaevaea’i ma le feitaga’i E ‘asa le faiva, o le seuga e foi fua

ITULAU MO TUPULAGA

FAAMOEWA O AETO

O le Aeto o le manulele e sili ona malosi, ma ua ta'ua lava ia o le tupu o manulele, e pei foi ta'u le Leona o le tupu o manu vaefā, ma le Malie o le tupu o i'a o le sami. O le Aeto fafine a oo mai le taimi e tautu'ufua ai, ona alu lea i le mea mauluga lava i luga o papa poo totolu foi o va o papa, o iina e fai ai lona faamoega e tuu ai ona fua. Ma e muamua lava ona ia saili mai vao matuitui ma vao talatala, o mea ma'ama'ai ma mea malō, e lalaga ai le pito i tua o le moega. A uma lea ona ia saili mai lea o fulufulu o manu vaefā ma isi manu felelei na te fasi ma 'ai, e lalaga ai le faamalū aupito i totolu o le moega. E amata mai le taimi e tautu'ufua ai le aeto ona lagona le mafanafana o le moega, se'ia oo ina fofoa mai tama'i aeto. E tuputupu a'e ma faasolo ina malolosi ma matutua tama'i aeto, a o fofaga pea e le aeto tina. Ma o le faiga lea e fiafia tele ai tamai aeto e nonofo pea i totolu o le faamoega, e mumusu e felelei ese. O le taimi foi lea e iloa ai e le aeto tina ua tatau ona tuu atu lana toloa'i. Ma o le auala e fai e le tina ina ia felelei ese ai tamai aeto, o le saei ese ma faaleaga le pito i totolu o le moega, poo le pito faamalū mafanafana o le faamoega. E fa'aaogā e le aeto matua ona mati'u'u malolosi e saei ese ai le faamoega faamalū, ona aliali mai lea na o le itu i fafo o le faamoega, le itu o mea ma'ama'ai ma matuitui, o mea malō ma talatala. E lagona e tama'i aeto le tiga ma le matuitui o le moega, ona amata lea ona feosofi ese mai le faamoega, ua amata ona tau apatā

OE UA FAI I LAGI

LE FOLAUGA

LEFAU KAISA VA

(6/1/1928 - 2/8/2020)

"E tupu olaola le tagata amiontonu e pei o le pama, e tupu tele e pei o le arasi o Lepanona. Oe ua totoina i le fale o le Alii, e tupu olaola i latou i le lotoa o le Atua. E oo ina ulu sinasina, latou te fua mai pea lava, e malolosi ma lauolaola i latou". Salamo 92:12-14,

O Lefau Kaisa Va o se alii tiakono ma se tamā matua o lenei Ekalesia i Vailele. O le tama matua ia Lefau Kaisa Va na soifua mai i le aso 06/01/1928 ae na faamanava e le Atua ana feau i le soifuaga nei i le aso 02/08/2020 ina ua 92 ona tausaga. Ona toe sauniga sa faia lava i Vailele, o le afioaga ma le ekalesia ua loa ona tautua ma galulue ai, i le aso 15/08/2020. Toatele sa molimau i le tamā, ma na latou taua o se tagata faamoemoeina ma faatuatua ina lona tulai mai. O lea ua molimau foi sui o aiga, aemaise o fanau. sa auga ma faataua e Lefau le soifua tautua ma ola auauna mo IESU ma lona EKALESSIA, o le tamā e alofa, e onosai ma lotomaulalo, e savali i upu na te a'oa'o. E matagofie galuega na te fai. . E tausa'afia, e onosai e alofa i lana fanau, ona uso ma tuafafine, ma a latou fanau, e agai iai ma faamaopoopo. E loto fesoasoani i so'o se tagata Sa fai e Lefau Kaisa Va le faata'ita'iga, e LE faalogologotiga pe solomuli pe a tele le auaunaga mana'omia. Na te le faatigā i se finagalo o se isi tagata, ae taulamua i le faatupu o le filemu ma le nofolelei. O Lefau

OE UA FAI I LAGI FOLAUGA

e tausi faifeau . E fai taulaga ma taulamua i faata'ita'iga lelei. O se tiakono sa faamoemoeina foi i le ekalesia i le tele o ana galuega sa fai. Sa fiafia lava foi matou te o i le fono i Malua, ma na silafia e Susuga i Toeaina lana galue, ona ia tofia ai lea o Lefau e fai ma Komiti Tumau o le fale o le Pulega.

Amuia lava lea auauana auā e valaau mai le matai ae oloo faapea ona fai. Sa auau lava foi manatu o lona toe sauniga i upu a le poto e faapea “o le tauleleia e sili i le suauu manogi ma le aso e oti ai e sili i le aso e fanau mai ai. Amuia oe Lefau ua e oti i le oti a le Kerisiano faamaoni ma ua e foi i lou Matai. Ia manuia lau malaga. Alofaaga mai ia te au nei faapea la tatou Aulotu i lau susuga i le Alii tiakono.

O le itula e 9.00 i le taeao, 15 Aukuso 2020 sa fai ai ona toe sauniga i Vailele. Sa ou ta'ita'iina le sauniga ma sa ou molimauina i le soifua galue o Lefau. Afioga ia Iosefo Tuala(FK) sa lauga ae saunia e Ma'auga Motu ia talosaga.O ona toe sauniga sa faataunuui lava lea i lona oliolisaga tumau I lona fanua i Vailele, ma sa ou ta'ita'iina foi lea vaega.

Ona matou faamavae atu lea ia te ia i le pese masani Pese 268, ‘Talofa, uso e tofaina oe.’ Tofa Lefau. Tofa loa.Ia manuia lau malaga.

*Saunia: Siaosi Salesulu (FS)
EFKS Vailele.
Matagaluega APIA I SASA 'E*

LIUI'A FATA SETALI SEVE SEAGA IUPATI

(3/4/1929 - 15/10/2019)

O le faletua o le tiakono, a'o se tinā matua o lenei aulotu, EFKS Kingsland, Niu Sila. Na soifua mai Liui'a Iupati i le aso 3 Aperila 1929, ae valaauna e lona Matai i le aso 15 Oketopa 2019, a'o i ai o ia i Ausetalia i le aai o Brisbane. Na faaipoipo atu i le tiakono ia Fata Milo Iupati, ua tu'umālō i le tausaga 2015. E to'a 12 o lāalo; 48 fanau a fanau; 12 fanau a fanau a fanau. O le tausaga 1981, na malaga mai ai le tinā ma le tiakono mai Samoa, ma galulue ai, i le aulotu i Kingsland, seia o'o ina ua fa'amānavaina e le Atua ana galuega.

O se tina e tele mea-alofa ma fa'amaniuiga a le Atua i lona soifua galue. E tausa'afia ma agamalū. O se tinā e fiafia e fai-taulaga i le Atua. O le tausaga e 2017, na fa'amāvae mai ai le tinā ile faifeau ma le aulotu, o le āmalaga i Ausetalia mo sina taimi, ona o le tau mafanafana i Brisbane, e aogā i lona soifua, ae fa'aauau pea le matāfale, e alo ma fanau. Peita'i, e le'i mālōlō ai le tautua a lenei tina, a'o i ai o ia i Ausetalia seia o'o ina ua tu'umalo. Na taunu'u mai lona sā mai Ausetalia i le aso 22 Oketopa 2019. O le Sauniga fa'ale-aiga, na ta'ita'i ai le Susuga

ia Safiti Iupati, sa faia i le aso Lulu, 23 Oketopa 2019 ile malumalu EFKS Kigiselani, Aukilani. Soso'o ai ma ona toe Sauniga, sa faia i le aso Faraile, 25 Oketopa 2019. Ta'ita'i: O le Susuga ia Ionatana Fa'aiuaso FT, Pulega Logan, Matāgaluega Kuiniselani i Saute, Ausetalia. O Safiti Iupati, na faaulufaleina lona sā, o Perelini Tauilo FS, Failautusi Pulega Logan, sa feagai ma le faitauina o le Tusi Paia, fa'apea Talosaga. O le Upu fa'amafanafana, sa saunoa ai le ta'ita'i o le Sauniga.

O le molimau a aiga, na saunia e Safiti Iupati. O a'u na molimau i le soifua fa'ale-agaga o le tina matua, atoa ai ma lona toe sauniga i le nofoaga mau i Mangere Cemetery; ma matou fa'atōfā atu ai i le tinā i le pese masani a le 'au Kerisiano. O Upu a le fai Salamo; “*Ole mea lea e fiafia ai lo'u loto, ma olioli ai lo'u mamalu, e malōlō fo'i lo'u tino ma le saogalemū...e fa'aola e le Atua lo'u agaga ai le pule o le tu'ugamau;*”

Ia fa'amafanafana le Agaga o le Atua i alo ma fanau, o aiga ma ana uo mamae, fa'apea le ekalesia EFKS Kingsland e pele ia te ia.

*Saunia e Fetuliaina Pama FS
EFKS Kingsland,
Mtg. AUKILANI*

O E UA FAI I LAGI FOLAUGA

GALUEGAPAPA TOMANE (14/7/1924 - 21/7/2020)

E maliu le tina ia Galuegapapa Tomane ua 96 tausaga o lona soifua. Na soifua mai i le aso 14/7/1924 ae na faamanava e le Atua ana feau i le aso 21/7/2020. O ona tuaā o Tomane Sofeni Tomane o Samatau ma Petesa Malupo o Vaitoomuli. O se tasi o Tina aupito i matua le soifua i totonu o le ekalesia ma le afioaga o Samatau. O se tasi o matafale faavae o le toe faatuina o le EFKS Samatau i le 1997. O se Tina e fiafia tele i le Lotu, e maliu o auai lava i tapuaiga i le falesa. O lo ma to' ai taunu'u i le Galuega i Samatau ia Oketopa 2015 na matauina ai uiga tausa'afia o lenei tina. O se tina e tausi faifeau, e loto i mea fai o le galuega, e fiafia e fai taulaga, e fiafia e fai meaalofa i le faifeau ma lona aiga. E oo lava i toonai a le aulotu e fiafia lava e auai ai.. O se Tina e fa'amalosiau i le atina'eina o le galuega i Samatau. E ui lava ina matua lona soifua, ae sa matauina pea lona malosi e auai i mea fai a le ekalesia. E maliu Galuega o loo lelei atoatoa lona mafaufau ma lana faalogo, na te le fa'aogaina foi se mata tioata e faitau ai lana Tusi Paia, e ui i le tele o tausaga o lona soifua. O le ta'aloga lava e fiafia i ai Galuega o le Bingo, auā e maua ai lona avanoa e tafao ma mafuta ai i le aulotu. E o'o lava foi i Bingo a isi

Ekalesia i totonu o le afioaga e fiafia lava e agai e tafao ai. Na amata le toe auai Galuega i a matou tapuaiga o le Aso Sa, i le vaiaso mulimuli o Me, ona ou taumafai lea ou te alu i ai i lona fale ma te fai lotu i taeao ao le'i faia a matou tapuaiga i le malumalu tapuai. O le ta o le 2 i le vaveao o le aso Lua 21 Iulai 2020 na maliu filemu ai o ia i lona aiga i Samatau. O ona toe sauniga sa faia i le aso Tofi 23 Iulai 2020. O Tomane Lomi Tomane sa fai ma sui o le fanau ma aiga e molimau i lea aso o le tina, ao a'u sa saunia lona molimau faaleagaga ma lagomau ai i lona oliolisaga tumau i lona aiga lava i Samatau. "Amuia ē ua oti, o e ua oti o i le Ali'i". Ja manuia lau malaga Tina. E lē galo lava oe.

*Julius Fruean FS,
EFKS Samatau, AANA.*

PA'U PE'A LEPULE FUAOA (20/5/1943 - 29/2/2020)

E maliu le tiakono ia Pa'u ua 76 tausaga ma masina e 9 o lona soifua. Na soifua mai i le aso 20/5/1943 ae faamanavaina e le Atua ana feau i le aso 29/2/2020. O se tasi o matafale faavae o le ekalesia ina ua toe faatu le EFKS Samatau i le 1997. O le aso 10/3/2020 na faamavae atu ai i le Tama i ona toe sauniga sa faia i le malumalu o le EFKS Samatau. Sa Taitai le susuga i le toeaina Caesar Samuelu FT. O Andrew Laufiso FS sa faaulufaleina lona tino maliu. O le

susuga i le Aoao Fesoasoani ia Tumalealiifano Sualauvi Vaaletoa sa saunia tatalo. O a'u sa tapenaina lona molimau faaleagaga ma le upu faamafanafana ma lona toe sauniga i lona oliolisaga tumau. Sa molimau le afioga ia Solomuavaa Sofaea Alo ma Manoo Lutena Mulitalo ma nisi o le aiga e fai ma sui o aiga. O se tama e fiafia e auai i tapuaiga e ui i le mamao o lona laoa ma le malumalu tapuai. Sa lagolago tele i i mea fai o le galuega a le Atua. O lona tomai faa-uelo, sa faaaogaina i le fausiaina o le pa mo le malae taalo o le fanau. Sa tuua e Pau lona aiga i le 1962 mo sailiga manuia i Niu Sila ae na toe taliu ma i le aiga i le 1979 ma tautua ai i le galuega a le Atua e ala i le toe faatuina ma atiae le ekalesia i Samatau. Sa galue i le Schwalger Brothers ma le WSTEC ina ua toe foi mai Niu Sila. Ma te omai i le galuega e leai ni faamaumauga o le galuega, ao le tamā ia Pa'u lea na ia aumaia ia te au tala tusia o ana lava tusitusiga ma faamaumauga i le toe taumafaiga o nai aiga sa loto faatasi e toe faatu le EFKS i le 1997. O se tamā foi e fiafia e faitau ma faamaumau mea e tutupu i le soifuaga. Sa molimauina foi le tele o ana fanau tausi ao matou mafuta. "Auā o lo'u ola o ia Keriso lea, ao lo'u oti o lo'u manuia lea" Filipi 1:21. Manuia lau malaga Pa'u.

*Julius Fruean FS,
EFKS Samatau, AANA.*

O E UA FAI I LAGI FOLAUGA



**GALUEGAPAPA
TOMANE**



**LIUI'A FATA SETALI
SEVE SEAGA IUPATI**



LEFAU KAISA VA



**PA'U PE'A
LEPULE FAUOA**

Susuga i le Faifeau Faauu mai le Matagaluega
Amerika, Susuga ia:
Ui Seanoa(FS) ma Luluvita Seanoa.

